



KEMENTERIAN PENDIDIKAN TINGGI
JABATAN PENDIDIKAN POLITEKNIK DAN KOLEJ KOMUNITI

SIARAN MEDIA

JPPKK PERKUKUH PERANAN TVET SERANTAU MELALUI PENGANJURAN PERSIDANGAN RANGKAIAN TVET SIDANG KEMUNCAK ASIA TIMUR KE-8 (EAS) 2025

Kuala Lumpur, 25 September 2025 - Jabatan Pendidikan Politeknik dan Kolej Komuniti (JPPKK) melalui Pusat Penyelidikan dan Inovasi (PPI), Bahagian Koordinasi TVET (BKTVET) dan Politeknik Sultan Azlan Shah (PSAS) telah mencatat sejarah dengan menjadi penganjur bersama Persidangan Rangkaian TVET Sidang Kemuncak Asia Timur ke-8 (EAS) 2025 atau *8th East Asia Summit (EAS) TVET Network Conference 2025* mulai 24 sehingga 26 September 2025 di ibu negara. Perasmian majlis ini telah disempurnakan oleh Dato' Dr. Haji Mohd Zahari bin Ismail, Ketua Pengarah Pendidikan Politeknik dan Kolej Komuniti, hari ini.

Program anjuran Korea Research Institute for Vocational Education and Training (KRIVET) telah mengangkat tema "*Strengthening Collaboration among TVET Institutions and ASEAN Industries*". Acara ini merupakan platform penting dalam memperkukuh jaringan kerjasama serantau, khususnya di antara institusi TVET dan industri ASEAN. Tumpuan utama persidangan kali ini adalah berkaitan hala tuju TVET pasca-pandemik, penerokaan inovasi digital serta pengukuhan hubungan strategik dengan pihak industri.

Persidangan ini berjaya menghimpunkan lebih 120 orang delegasi yang terdiri daripada 50 pakar antarabangsa, termasuk penyelidik, pembuat dasar, dan pemimpin dari negara-negara ASEAN serta rakan strategik seperti Korea, Malaysia, Vietnam, Filipina, India, Laos, Thailand, dan Indonesia. Selain itu, terdapat 70 jemputan tempatan yang terdiri daripada ahli akademik, penyelidik dan wakil industri daripada pelbagai agensi kerajaan dan sektor kemahiran tinggi TVET.

Penganjuran persidangan ini juga berfokuskan kepada perkongsian dapatan kajian yang menekankan aspek kolaborasi industri dalam bidang TVET, peluang kerjasama bersama Politeknik dan Kolej Komuniti (POLYCC), penjenamaan TVET Malaysia di persada antarabangsa serta pengukuhan jaringan serantau yang mampu

memperkasa mobiliti pensyarah dan pelajar POLYCC. Semua usaha ini selaras dengan aspirasi negara untuk terus melonjakkan imej TVET Malaysia di peringkat global.

-TAMAT-

**JABATAN PENDIDIKAN POLITEKNIK DAN KOLEJ KOMUNITI
KEMENTERIAN PENDIDIKAN TINGGI
25 September 2025**